

COMISIÓN INFORMATIVA DE TERMALISMO, TURISMO E MEDIO AMBIENTE

ACTA da mencionada comisión informativa, correspondente ó día **18 de outubro de 2018**

ASISTENTES:

PRESIDENTE: D.^a Ana María Villarino Pardo DEPUTADOS/AS: D.^a Consuelo Vispo Seara D. José Antonio Feijóo Alonso D. Antonio Montero Fernández D. Miguel A. Cid Álvarez D.^a M.^a Teresa Cerdeira Valiñas D. Vicente Gómez García D.^a Isabel Gil Álvarez D. Adolfo González Nóvoa D. Armando Ojea Bouzo D. Ramiro Rodríguez Suárez SECRETARIO: D. Juan Marquina Fuentes INTERVENTOR ACCTAL: D. José Mosquera Casero	No Pazo da Deputación Provincial de Ourense, o 18 de outubro de 2018, ás 17.30 horas, baixo a presidencia de dona Ana María Villarino Pardo e con asistencia dos señores/as á marxe relacionados, reúnese a expresada comisión informativa, co fin de proceder á preparación e estudo dos asuntos que se indican, adoptándose os seguintes acordos:
--	---

1º.- ACTA ANTERIOR, CORRESPONDENTE Á ORDINARIA DO DÍA 20 DE SETEMBRO 2018.-

En relación coa acta da reunión anterior, correspondente á ordinaria do día 20 de setembro de 2018, non se formulan observacións e queda aprobada por unanimidade.

2º.- PROGRAMA DE COOPERACIÓN ENTRE A DEPUTACIÓN PROVINCIAL DE OURENSE E O CONCELLO DE TOÉN, PARA A PRESTACIÓN DE ASISTENCIA TÉCNICA PARA A XESTIÓN DO BOBMEO DE AUGA RESIDUAL EN PUGA.-

O Sr. vicesecretario expón o contido do programa.

Non se producen intervencións e co voto favorable do Grupo Popular (6) e a abstención do Grupo Socialista (3), de Democracia Ourensana (1) e do BNG (1), a comisión ditamina favorablemente a adopción, por parte da Xunta de Goberno, do seguinte acordo:

Aproba-lo Programa de cooperación entre a Deputación Provincial de Ourense e o Concello de Toén para a prestación de asistencia técnica para a xestión do bombeo de auga residual de Puga, de acordo coas seguintes cláusulas:

1ª) Obxecto

Constitúe o obxecto deste programa a regulación das condicións de prestación pola Deputación Provincial de Ourense ao concello de Toén do servizo de asistencia e cooperación para a xestión do bombeo de auga residual sito en Puga.

Este programa adóptase en exercicio da competencia provincial para prestarlles asistencia e cooperación ós concellos e demais entidades locais en materia de servizos municipais prevista nos artigos 36.1.a) e b) da Lei 7/1985, *do 2 de abril, reguladora das bases do réxime local*, e da competencia municipal para a ordenación e xestión do servizo de sumidoiros, configurado como servizo mínimo obrigatorio polo artigo 26 da mesma lei básica de réxime local.

2ª) Condicións da prestación do servizo

A Deputación Provincial de Ourense prestaralle ó concello a asistencia técnica consistente nun plan de mantemento preventivo das instalacións, semanal, no que se inclúe a limpeza, a xestión de control de alarmas do bombeo e o seu seguimento (respondendo a calquera hora e día) e a asistencia ás avarías que se ocasionen.

O servizo non abrangue o financiamento da substitución dos equipos, as súas reparacións ou materiais e accesorios, o mantemento correctivo dos elementos da instalación nin a rede de sumidoiros conectadas nin a subministración de enerxía eléctrica.

Os servizos de asistencia técnica serán prestados pola Deputación Provincial de Ourense de forma indirecta a través da entidade Aquaourense, Sociedade Provincial de Augas e Medio Ambiente SA, sociedade de capital mixto participada pola Deputación Provincial, na súa condición de concesionaria do servizo provincial de asistencia e cooperación con entidades locais en materia de servizos relacionados co ciclo hidráulico e medio ambiente.

Para levar a cabo a prestación do servizo é necesario colocar un sistema de alarmas mediante Telecontrol GSM, que será realizado pola entidade AquaOurense, sen prexuízo de que o Concello deba subministra-la oportuna tarxeta SIM de comunicación co equipo.

En todo caso, o servizo público obxecto deste programa conservará, en todo momento, o seu carácter de servizo público municipal, de titularidade do Concello de Toén, correspondéndolle a súa xestión sen prexuízo da cooperación da Deputación.

3ª) Retribucións económicas

En contraprestación polo servizo prestado, a Deputación Provincial percibirá os seguintes prezos públicos:

a) Tarifa fixa única pola instalación dun Telecontrol GSM e autómata modelar: 500 € (IVE excluído).

b) Custo anual: 3.015,46 €/ano (IVE excluído).

Ás tarifas sinaladas aplicaráselle-lo IVE vixente en cada momento.

A Deputación Provincial de Ourense aprobará as oportunas liquidacións anuais que se lle notificarán ó concello, outorgándolle un prazo de trinta días para o seu pago.

4ª) Comisión de seguimento, control e vixilancia

Establécese unha Comisión de Seguimento, Control e Vixilancia do programa, presidida polo deputado delegado de cooperación e seguimento do plan do mandato

2015-2019 e que estará integrada polo director da Área de Medio Ambiente e un representante designado polo concello, entendendo que, en ausencia de designación expresa, a dita representación lle corresponderá ó respectivo alcalde. Actuará como secretaria da comisión a asesora xurídica de Medio Ambiente ou funcionario que legalmente a substitúa, coas funcións propias dun secretario de órgano colexiado conforme co establecido na Subsección 1, Sección 3ª, título preliminar da Lei de réxime xurídico do sector público.

A Comisión de Seguimento, Control e Vixilancia reunirse a pedimento de calquera das partes integrantes, e as súas funcións serán as de seguimento da aplicación do programa, interpretación e resolución de incidencias. No caso de non acadarse un acordo no seo da comisión, a Presidencia da Deputación Provincial de Ourense resolverá unilateralmente e con carácter executivo o que proceda, sen prexuízo da posibilidade de impugnación deste acto administrativo pola entidade local interesada conforme co sistema de recursos vixente no noso ordenamento xurídico.

5ª) Vixencia

Este programa estará vixente desde o primeiro día do mes seguinte á súa publicación ata o 31 de decembro do 2019.

6ª) Natureza e réxime xurídico

Este programa terá natureza administrativa, correspondéndolle á xurisdición contencioso-administrativa a resolución das controversias sobre a súa validez, eficacia, efectos e extinción.

3º.- MOCIÓNS DE URXENCIA.- Non se presentan.

4º.- ROGOS E PREGUNTAS.- Nesta quenda prodúcense as seguintes intervencións:

D. Adolfo González Nóvoa, do Grupo Socialista, pregunta se a Deputación fixo algunha actuación ao respecto da moción aprobada no Pleno hai máis dun ano relativa á franxa de xestión da biomasa.

A **presidenta da comisión** manifesta que se contestará por escrito.

E, ás 17.33 horas, dáse por finalizada a reunión, redactándose a presente acta, que asinan a presidenta e o secretario. Certifico.